



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Na osnovu člana 32 Dopunjenog i izmijenjenog Statuta Udruženja/Udruge psihijatara u Bosni i Hercegovini, Skupština Udruženja/Udruge psihijatara u Bosni i Hercegovini na sjednici Generalne skupštine održanoj 15 oktobra/listopada 2010. godine u Bihaću, donijela je

PRAVILNIK

O RADU SUDA ČASTI

UDRUŽENJA/UDRUGE PSIHIJATARA

U BOSNI I HERCEGOVINI

I) OPŠTE ODREDBE

Član 1

Ovim Pravilnikom o radu Suda časti (u daljem tekstu: Pravilnik) utvrđuju se organizacija, način rada, nadležnost, tok postupka pred Sudom časti (u daljem tekstu: Sud) Udruženja/Udruge psihijatara u Bosni i Hercegovini (u daljem/daljnem tekstu: Udruženje/Udruga), mjere koje se izriču za disciplinske povrede utvrđene Statutom Udruženja/Udruge, kao i pravni lijekovi.

Član 2

Sud Udruženja/Udruge je organ Udruženja/Udruge koji vrši svoju funkciju utvrđenu Statutom Udruženja/Udruge i ovim Pravilnikom.

Sud je u obavljanju svoje funkcije samostalan i neovisan i sudi na osnovu Statuta Udruženja/Udruge, Kodeksa profesionalne etike zdravstvenih radnika Bosne i Hercegovine i ovog Pravilnika.

Sud ima sjedište u sjedištu Udruženja, u Sarajevu.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Član 3

Sud iz člana 2 ovog Pravilnika utvrđuje povredu profesionalne dužnosti ili ugleda člana Udruženja/Udruge, na osnovu provedenog postupka za utvrđivanje disciplinske odgovornosti člana Udruženja/Udruge.

II) DISCIPLINSKA ODGOVORNOST

Član 4

Povrede profesionalne dužnosti ili ugleda člana Udruženja/Udruge postoje ako član Udruženja svojim činjenjem ili nečinjenjem:

- postupa u suprotnosti sa odredbama Zakona kojima se uređuju zdravstvena zaštita i / ili zdravstveno osiguranje u pružanju zdravstvene zaštite pacijentima,
- povrijedi Kodeks profesionalne etike zdravstvenih radnika Bosne i Hercegovine,
- obavlja zdravstvenu djelatnost nestručno, odnosno u suprotnosti sa suvremenim dostignućima medicinske nauke i prakse, ili ako načini stručni pogrešku,
- svojim ponašanjem prema pacijentima, drugim članovima Udruženja/Udruge ili trećim osobama povrijedi ugled profesije,
- ne ispunjava obaveze člana Udruženja/Udruge utvrđene Statutom i drugim općim aktima Udruženja/Udruge.

Povrede profesionalne dužnosti ili ugleda člana Udruženja Sud klasificira kao: Lake, Teške i Posebno teške povrede.

Član 5

Pred Sudom može odgovarati samo član Udruženja/Udruge.

Član 6

U postupku pred Sudom primjenjuju se postupci u vidu usmene rasprave, dokazivanja, dostavljanja zapisnika, isključenja javnosti kao i načela, kao što su načelo zakonitosti, načelo istine, načelo ocjene dokaza, načelo samostalnosti u rješavanju, ukoliko Statutom i ovim Pravilnikom nije drugačije određeno.

www.upubih.com



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Član 7

Svi sudionici u postupku pred Sudom kao i članovi Udruženja/Udruge, organi, tijela i organizacijski oblici Udruženja/Udruge su dužni da Sudu dostavljaju akte, spise, podatke i obavijesti koji su potrebni u postupku odlučivanja pred Sudom.

Članovi Udruženja/Udruge su dužni, po zahtjevu Suda, da dostave na uvid potrebna dokumenta za potrebe postupka.

Član 8

O svom radu Sud izvještava Generalnu Skupštinu Udruženja/Udruge i podnosi joj godišnji izvještaj.

Član 9

Sud vrši raspravu na temelju priloženih dokaza, u granicama prijedloga za pokretanje disciplinskog postupka, pazeći po službenoj dužnosti na nadležnost, dopuštenost i pravovremenost.

Član 10

Kad Sud utvrdi da je prijedlog za pokretanje postupka podnjet od neovlaštene osobe ili da prijedlog nije dopušten, jer nije predmet rasprave pred Sudom ili kada je neblagovremeno podnesen prijedlog za pokretanje postupka, ili je zahtijevani dokument koji ima snagu dokaza stigao Sudu po isteku roka, rješenjem će obustaviti postupak, a rješenje je konačno bez prava žalbe.

Član 11

Usmena rasprava je po pravilu javna.

Predsjednik Suda može svojim obrazloženim zaključkom, po službenoj dužnosti, isključiti javnost s cijele rasprave, ili jednog njenog dijela ako to zahtijevaju razlozi morala ili javne sigurnosti kao i radi zaštite državne, vojne, službene, poslovne, profesionalne ili naučne tajne.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Zahtjev za isključenje javnosti s cijele rasprave ili jednog njenog dijela može podnijeti i podnositelj zahtijeva ili član Udruženja/Udruge protiv koga se postupak pred Sudom vodi. Zahtjev se podnosi Predsjedniku Suda.

Protiv rješenja Predsjednika Suda kojim isključuje javnost s rasprave pred Sudom ili kojim se zahtjev za isključenje javnosti odbija nije dopuštena žalba.

U postupku pred Sudom časti u kome je isključena javnost, sudionici u postupku dužni su čuvati kao tajnu sve ono što doznaju kao sudionici u postupku pred Sudom.

U postupku pred Sudom časti uvijek će biti isključena javnost zbog interesa djece i maloljetnih osoba i u tom slučaju javnost će biti isključena po službenoj dužnosti.

III) NADLEŽNOST I SASTAV SUDA ČASTI

Član 12

Sud ima nadležnost u postupcima pred Sudom na cijeloj teritoriji Bosne i Hercegovine.

Sud ima Predsjednika i dva člana.

Sud bira Skupština Udruženja/Udruge i članovi Suda su isključivo članovi Udruženja/Udruge.

Predsjednik i članovi Suda biraju se na četiri godine.

Predsjednik i članovi Suda ne mogu biti članovi drugih rukovodećih tijela Udruženja/Udruge.

Sud može prema potrebama angažirati osobe za stručnu službu Suda. Stručnu službu Suda čine osobe koja sudovima pružaju pravno-tehničku, administrativnu i drugu pomoć i čine je osobe koje su po struci diplomirani pravnici s pravosudnim ispitom, s kojima Udruženje/Udruga može sklopiti Sporazum o privremenoj i/ili povremenoj suradnji.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Član 13

Predsjednik i članovi Suda ne mogu vršiti dužnost u Sudu:

- ako su oštećeni radnjom člana Udruženja/Udruge protiv kojega se vodi postupak,
- ako im je član Udruženja/Udruge iz tačke 1 ovog člana, ili njegov opunomoćenik bračni drug ili bivši bračni drug ili rođak po krvnoj liniji,
- ako su sa članom Udruženja/Udruge iz tačke 1 ovog člana ili njegovim opunomoćenikom u odnosu staratelja, usvojitelja ili hranitelja,
- ako su u istom predmetu saslušani kao svjedoci,
- ako su zaposleni u istom pravnom subjektu kao i član Udruženja/Udruge protiv kojeg se vodi postupak,
- ako postoje druge okolnosti koje izazivaju sumnju u njihovu nepristrasnost.

Član 14

Predsjednik ili član Suda čim sazna da postoji razlog za izuzeće, ili obrazloženi zahtijev za izuzeće podnosi lice koje podnijelo prijedlog za pokretanje postupka ili član Udruženja/Udruge protiv koga se postupak vodi, uz navođenje okolnosti zbog kojih se smatra da postoji neki od osnova za izuzeće, dužan je prekinuti svaki rad na tom predmetu i o tome obavijestiti Predsjednika Skupštine Udruženja/Udruge ili Predsjednika Suda.

Predsjednik Suda rješava o zahtijevu za izuzeće članova Suda, a Predsjednik Skupštine Udruženja/Udruge rješava o zahtijevu za izuzeće Predsjednika Suda.

Član 15

Prije donošenja odluke o izuzeću saslušaće se član Suda čije se izuzeće traži.

Protiv odluke kojom se zahtjev za izuzeće usvaja ili odbija nije dopuštena žalba.

Odredbe o izuzeću članova Suda primjenjuju se i na eventualne vještake i na zapisničara.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

IV) POSTUPAK PRED SUDOM ČASTI

Član 16

Sud može pokrenuti disciplinski postupak na zahtijev oštećene osobe, ili po službenoj dužnosti kada postupak pred Sudom mogu pokrenuti: Skupština Udruženja/Udruge, Upravni ili Nadzorni odbor Udruženja/Udruženja i Predsjedništvo Udruženja/Udruge.

Postupak pred Sudom časti po službenoj dužnosti može biti pokrenut ako se na temelju činjenica do kojih Udruženje/Udruga dođe iz pritužbi građana ili iz drugih okolnosti posumnja da je član Udruženja/Udruge izvršio povredu profesionalne dužnosti ili ugleda članova Udruženja, a shodno odredbama ovog Pravilnika.

Prijedlog za pokretanje postupka pred Sudom podnosi se Sudu u pismenom obliku i mora sadržavati: naziv tijela pred kojim se vodi postupak; ime i prezime ljekara protiv koga se vodi postupak; podatke o zaposlenju ljekara; vrijeme i mjesto izvršenja povrede; činjenice i okolnosti potrebne da se povreda odredi; dokaze kojima se potkrepljuju navodi iz prijave, kao i prijedloge koje dokaze treba izvesti pred Sudom; kao i prijedlog da se ljekar proglasi odgovornim.

Članak 17

Prijedlog za pokretanje postupka dostavlja se Sudu, a Sud ispituje ispunjenost formalnih uvjeta za vođenje postupka pred Sudom i ukoliko utvrdi da prijedlog za pokretanje postupka ne sadrži sve potrebno da bi se na osnovu njega postupalo, može tražiti od podnositelja prijedloga da dopuni ili ispravi prijedlog u roku od osam dana, te da ukoliko isti ne postupi u datom roku smatraće se da je od prijedloga odustao o čemu će se donijeti rješenje.

Ako je prijedlog podnijela neovlaštena osoba, ili osoba koja nema pravni interes za vođenje postupka, ili je prijedlog nedopušten jer nije predmet rasprave pred Sudom, ili je prijedlog neblagovremen, rješenjem će se odbaciti podnijeti prijedlog.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Sud, kome je dostavljen prijedlog za pokretanje postupka dužan je u roku od 30 dana donijeti rješenje kojim se ili ustanovi da su ispunjeni formalni uvjeti za vođenje postupka pred Sudom ili rješenje kojim se prijedlog za vođenje postupka pred Sudom odbacuje, ukoliko nisu ispunjeni formalni uvjeti za vođenje postupka.

Protiv rješenja iz predhodnog stava ovog člana nije dopuštena žalba i ono se smatra konačnim.

Član 18

Po dobijanju prijedloga, za koji je Sud utvrdio ispunjenje formalnih uvjeta za vođenje postupka, Sud je dužan da ocijeni da li postoji osnova prijedloga i jesu li osigurani materijalni dokazi.

Sud mora provjeriti sve činjenice, navode i dokaze i u tom smislu tražiti pismenu izjavu od člana Udruženja/Udruge protiv koga je podniet prijedlog za vođenje postupka pred Sudom, od poslodavca gdje je član Udruženja/Udruge zaposlen, kao i drugih osoba za koje se pretpostavlja da imaju saznanja vezana za predmet prijave.

Članu Udruženja/Udruge protiv koga je podniet prijedlog za vođenje postupka pred Sudom dostavlja se primjerak prijedloga za vođenje postupka pred Sudom, s pozivom da se u roku od 8 dana prema istom izjasni i sa upozorenjem da će se postupak provesti i bez njegove pismene izjave.

Član 19

U roku od 30 dana, od dana kada je određen da provede istražne radnje Sud će donijeti:

- obrazloženo rješenje kojim konstatuje da je prijedlog za pokretanje postupka pred Sudom opravdan,
- ili
- obrazloženo rješenje da je prijedlog za pokretanje postupka pred Sudom neosnovan.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Protiv rješenja iz predhodnog stava ovog člana suca Suda određenog za provođenje istražnih radnji, može se podnijeti žalba u roku od 8 dana. Žalbu mogu podnijeti: podnositelj prijedloga za pokretanje postupka ili član Udruženja/Udruge protiv koga je podnijet prijedlog za pokretanje postupka.

O žalbi iz prethodnog stava odlučuje Predsjednik Skupštine Udruženja/Udruge u pismenoj formi, u roku 8 dana od prijema/primitka žalbe i njegova odluka je po tom pitanju konačna bilo da žalbu usvoji, odbije ili odbaci.

Postupak se smatra započetim dostavljanjem pismenog zahtijeva za pokretanje postupka pred Sudom od strane Suda.

Član 20

Član Udruženja/Udruge protiv koga je pokrenut disciplinski postupak mora biti pismeno obaviješten o datumu i mjestu održavanja rasprave pred Sudom i naznačenjem/naznakom članka Statuta Udruženja/Udruge, Kodeksa profesionalne etike i Pravilnika o radu Suda na osnovu kojeg se tereti za povredu profesionalne dužnosti ili ugleda člana Udruženja/Udruge.

Poziv za održavanje rasprave pred Sudom mora biti uručen članu Udruženja/Udruge protiv kojega se vodi postupak najmanje osam dana prije održavanja rasprave pred Sudom.

Poziv članu Udruženja/Udruge protiv kojega je postupak pokrenut mora da sadrži i: pouku o njegovom pravu da u postupku ima branitelja, kao i da se rasprava može održati i bez njegove prisutnosti.

Član 21

U pripremi rasprave pred Sudom, isti će po službenoj dužnosti rješenjem obustaviti disciplinski postupak ukoliko:

- je podnositelj zahtijeva odustao od zahtijeva za pokretanje disciplinskog postupka, prije nego što je rasprava počela,
- ako je postupak vođen bez zahtijeva ovlaštenog podnositelja zahtijeva,



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

- ako je član Udruženja/Udruge protiv koga je podnesen zahtijev za isto djelo već konačnom odlukom Suda proglašen odgovornim, oslobođen odgovornosti ili je postupak protiv njega konačno obustavljen.

Član 22

Raspravi prisustvuju osobe koje su pozvane: osoba koja je podnijela prijavu, član Udruženja/Udruge protiv kojega se vodi postupak, branitelj ukoliko ga ima, lica koja su pozvana u svojstvu svjedoka, vještaka i dr., kao i druge osobe koje žele prisustvovati raspravi, ukoliko u postupku nije isključena javnost i u onoj mjeri koliko uvjeti Suda to dozvoljavaju.

Predsjednik Suda može izuzetno odložiti ročište:

- kada nisu pristupile pozvane stranke, a Predsjednik Suda ocijeni da je njihovo prisustvo potrebno,
- ako je potrebno izvesti nove dokaze, a stanje iz spisa nije dovoljno razjašnjeno.

Nije dozvoljena žalba protiv odluke o odlaganju rasprave.

Rasprava se može održati u odsustvu osobe protiv koje se postupak vodi (pod uvjetom da je uredno pozvana) a ukoliko s rasprave odsustvuje uredno pozvan podnositelj prijave, a svoje odsustvo ne opravda, Sud će rješenjem obustaviti postupak.

Član 23

Raspravom pred Sudom rukovodi Predsjednik Suda.

Predsjednik Suda utvrđuje jesu li došle sve pozvane osobe, da li su im pozivi uredno uručeni i odlučuje da li rasprava može održati u odsutnosti nekih od uredno pozvanih osoba.

Rasprava počinje čitanjem zahtijeva za pokretanje postupka, od strane Predsjednika Suda, koji objavljuje predmet rasprave pred Sudom i sastav Suda.

Predsjednik Suda brine o održavanju reda u toku rasprave. Ukoliko neka osoba narušava red, Predsjednik Suda je može opomenuti, što se unosi u zapisnik, a nakon toga ukoliko osoba i dalje nastavi s narušavanjem reda Predsjednik Suda je udaljava iz prostorije u kojoj se održava rasprava, što će takođe biti unijeti u zapisnik.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Predsjednik Suda u postupku prvo uzima izjavu od ljekara protiv koga se postupak vodi, a nakon njegovog izlaganja može mu postavljati pitanja, a zatim je dužan dozvoliti ostalim članovima Suda, podnosiocu prijave i njegovom branitelju da postavljaju pitanja članu Udruženja/Udruge protiv kojega se vodi postupak.

Član Udruženja/Udruge protiv koga se postupak vodi može se izjašnjavati o svim okolnostima koje ga terete i iznositi sve činjenice koje mu idu u korist i predlagati izvođenje dokaza koji mu služe za obranu ili se braniti šutnjom, a što ne može predstavljati otežavajuću okolnost.

Član 24

Stranke u postupku su dužne iznijeti sve činjenice i predložiti dokaze na kojima se temelji njihov zahtjev, ili kojima se pobijaju navodi iz zahtjeva. O prijedlozima stranaka za izvođenje dokaza Predsjednik Suda odlučuje rješenjem, protiv kojega nije dopuštena žalba.

I sam Sud po službenoj dužnosti može odrediti izvođenje dokaza koje stranke nisu predložile.

Član 25

U provedbi dokaznog postupka članovi Suda mogu pozivati svjedoke, za koje se pretpostavlja da mogu dati informacije na osnovu svog neposrednog ili posrednog opažanja, vezano za učinjenu povredu člana Udruženja/Udruge protiv koga se postupak vodi i svim drugim okolnostima vezanim za donošenje odluke u postupku pred Sudom.

Svjedocima nakon ispitivanja od strane Predsjednika Suda i članova Suda pitanja mogu postavljati i podnositelj prijave i njegov branitelj kada im Predsjednik Suda da riječ.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Član 26

Nakon provedenog dokaznog postupka Predsjednik Suda daje riječ strankama i to prvo podnosiocu prijave, branitelju i na kraju ljekaru protiv koga se postupak vodi.

Nakon provedenog dokaznog postupka Predsjednik Suda će objaviti da je rasprava završena.

V) DONOŠENJE ODLUKE I ZAPISNIK

Član 27

Kada ocijeni da su razlozi za vođenje usmene javne rasprave iscrpljeni Sud će istu zaključiti.

Sud će nakon toga pristupiti nejavnoj sjednici Suda gdje će predmet ponovo razmotriti i donijeti odluku.

Donošenje Odluke Suda vrši se većinom glasova članova Suda.

O donošenju Odluke iz stava 2 ovog člana vodi se zapisnik, koji se čuva razdvojeno od spisa predmeta.

Zapisnik se vodi o vijećanju i glasanju, usmenoj raspravi i izvođenju dokaza.

Zapisnik sadrži datum i mjesto donošenja Odluke iz stava 2 ovog člana, kao i o vijećanju i glasanju, usmenoj raspravi i izvođenju dokaza.

Zapisnik potpisuju Predsjednik i članovi Suda, te zapisničar.

Član 28

Po izvršenom vijećanju i glasanju o donošenju Odluke Sud može objaviti Odluku odmah, ili izvršiti objavljujuće iste dostavljanjem pismenog dopisa strankama u postupku u roku od 15 dana od dana zaključenja glavne rasprave.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Član 29

Pismena odluka o izricanju disciplinske mjere sadrži kratak uvod s pozivom na pravni osnov za donošenje Odluke, izricanje i obrazloženje Odluke i pouku o pravnom lijeku.

Član 30

Odluku kojom se **zahtjev za pokretanje postupka odbija** Sud će izreći:

- ako je postupak pred Sudom časti vođen bez zahtijeva osobe ovlaštene za vođenje postupka,
- ako podnositelj prijave odustane od prijave do zaključenja rasprave,
- ako je već ranijom konačnom odlukom Suda odlučeno o odgovornosti ljekara, a radi se o istom činjeničnom stanju,
- ako je nastupila zastarjelost pokretanja ili vođenja postupka.

Član 31

Odluku kojom se ljekar **oslobađa** odgovornosti Sud će izreći:

- ako djelo za koje se ljekar tereti ne predstavlja povredu profesionalne dužnosti ili ugleda člana Udruženja/Udruge iz člana 4 ovog Pravilnika,
- ako nije dokazano da je član Udruženja/Udruge počinio djelo za koje se tereti.

Član 32

U Odluci kojom se ljekar/liječnik **oglašava odgovornim** Sud će izreći:

- za koje se djelo oglašava odgovornim,
- kakva se disciplinska mjera izriče,
- Odluku o eventualnim troškovima postupka,
- uputu o pravnom lijeku.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

Član 33

Za povrede profesionalne dužnosti ili ugleda člana Udruženja/Udruge iz člana 4 ovog Pravilnika, Sud može izreći jednu od sljedećih disciplinskih mjera:

1. Disciplinske mjere za LAKE POVREDE

- opomena
- javna opomena

2. Disciplinske mjere za TEŠKE POVREDE

- prijedlog matičnoj zdravstvenoj ustanovi za privremenim ograničenjem obima i vrste poslova kojima se član Udruženja/Udruge bavi, koja se ne može izreći u kraćem trajanju od šest mjeseci ni u dužem od jedne godine,
- prijedlog nadležnoj Komori doktora medicine o privremenom oduzimanju licence, koja se ne može izreći u kraćem trajanju od šest mjeseci ni u dužem od jedne godine.

3. Disciplinske mjere za OSOBITO TEŠKE POVREDE

- prijedlog matičnoj zdravstvenoj ustanovi za privremenim ili trajnim ograničenjem obima i vrste poslova kojima se član Udruženja/Udruge bavi, u trajanju do 5 godina,
- prijedlog nadležnoj Komori doktora medicine za privremeno oduzimanje licence, u trajanju do 5 godina,
- prijedlog nadležnoj Komori doktora medicine o trajnom oduzimanju licence.

Pri određivanju disciplinske mjere Sud mora uzeti u obzir težinu i posljedice učinjene povrede, okolnosti pod kojima je do učinjene povrede došlo, stupanj krivnje počinitelja i njegovo držanje nakon učinjene povrede i druge olakšavajuće ili otežavajuće činjenice i okolnosti koje su imale uticaj na donošenje disciplinske mjere .



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

VI) ŽALBA

Član 34

Protiv odluke Suda član Udruženja/Udruge protiv koga se vodio postupak, odnosno njegov branitelj, kao i podnositelj zahtijeva mogu podnijeti žalbu Predsjedniku Skupštine Udruženja/Udruge u roku od 15 dana od dana prijema odluke.

Žalba mora sadržavati:

- označenje Odluke protiv koje se izjavljuje žalba,
- izjavu da li se Odluka pobija u cijelosti ili u njenom određenom dijelu,
- razloge žalbe,
- potpis podnosioca žalbe.

Član 35

- Odluka Suda se može pobijati zbog:
- bitne povrede odredaba postupka definiranih Pravilnikom o radu Suda,
- pogrešno ili nepotpuno utvrđenog činjeničnog stanja,
- Odluke o izrečenoj disciplinskoj mjeri.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

VII) POSTUPAK PO ŽALBI

Član 36

Predsjednik Skupštine Udruženja/Udruge razmatra žalbu na Odluku, zajedno sa članovima Predsjedništva Udruženja/Udruge i odlučuje o žalbi u roku od 60 dana od dana prijema žalbe.

Član 37

Predsjednik Skupštine i Predsjedništvo Udruženja/Udruge mogu donijeti sljedeće odluke:

- odbaciti žalbu kao neblagovremenu ili kao nedopuštenu,
- odbiti žalbu kao neosnovanu i potvrditi Odluku Suda,
- uvažiti žalbu, ukinuti Odluku Suda i vratiti Sudu predmet na ponovo raspravljanje i odlučivanje,
- uvažiti žalbu i promijeniti/preinačiti Odluku Suda.

Član 38

Odluka Predsjednika Skupštine Udruženja se u pismenoj formi dostavlja članu Udruženja/Udruge protiv koga je vođen postupak pred Sudom, ili njegovom branitelju ukoliko ga ima, kao i podnositelju zahtijeva za pokretanje postupka.

Ova odluka je konačna i protiv nje se ne može voditi spor.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

VIII) IZVRŠENJE DISCIPLINSKIH MJERA

Članak 39

Disciplinske mjere i kazne izvršavaju se kad odluka Suda postane pravosnažna, u roku od šest mjeseci od dana pravosnažnosti.

Javna opomena objavljuje se u štampanim medijima i distribuira uobičajenim načinom obavještavanja članovima Udruženja/Udruge.

Konačna Odluka kojom je ljekar oslobođen odgovornosti objavljuje se u štampanim medijima.

Član 40

Izrečena mjera briše se iz evidencije po isteku od tri godine od pravosnažnosti odluke, ukoliko ljekar nije počinio novu povredu od pravosnažnosti odluke.

IX) ZASTARJELOST

Član 41

Pokretanje disciplinskog postupka zastarjeva istekom jedne godine od dana učinjene povrede profesionalne dužnosti i ugleda člana Udruženja/Udruge iz člana 4 ovog Pravilnika.

Zastara izvršenja mjere definirane ovim Pravilnikom nastupa po isteku šest mjeseci od dana pravosnažnosti odluke o izrečenoj mjeri.

Ako se zbog povrede protiv ljekara vodi postupak pred Sudom a istovremeno je pokrenut ili se vodi prekršajni ili kazneni postupak, Sud može zaustaviti postupak pred Sudom do okončanja kaznenog, odnosno prekršajnog postupka.



UDRUŽENJE/UDRUGA PSIHIJATARA U BOSNI I HERCEGOVINI
PSYCHIATRIC ASSOCIATION OF BOSNIA-HERZEGOVINA

X) PRELAZNE I ZAVRŠNE ODREDBE

Član 42

Ovaj Pravilnik vrijedi od dana Usvajanja Dopuna i izmjena Statuta Udruženja/Udruge i izbora članova Suda časti Udruženja/Udruge.

Br.: 02/2010

Bihać, 15.10.2010. godine

Predsjednik Skupštine UPUBiH:

Prof. dr. med. sc. Ismet Cerić